



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH», broj: 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH», broj: 96/13, 89/16 i 5/22) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08 i 5/22), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2020. GODINU BOSS-BOSANSKE STRANKE-MIRNES AJANOVIĆ

Broj: 03-07-6-732/21
Sarajevo, 28.12.2022. godine

SADRŽAJ

| | |
|---|---|
| MIŠLJENJE REVIZORA..... | 3 |
| 1. UVOD..... | 4 |
| 2. PREDSTAVLJANJE POLITIČKE STRANKE..... | 4 |
| 3. OPIS PREGLEDA I KONTROLE FINANSIJSKOG IZVJEŠTAJA | 5 |
| Predmet pregleda i kontrole..... | 5 |
| Cilj pregleda i kontrole | 5 |
| Obim pregleda i kontrole..... | 5 |
| 4. PRETHODNE KONTROLE I REVIZIJE..... | 5 |
| 5. NALAZI I PREPORUKE..... | 5 |
| 5.1.NALAZI..... | 5 |
| 5.2. PREPORUKE | 9 |

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja BOSS-Bosanske stranke-Mirnes Ajanović za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih 2020. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2020. godinu, utvrđeno je da je BOSS-Bosanska stranka-Mirnes Ajanović prekršila odredbe člana 4. stav (1), člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka izvršila je pregled godišnjeg finansijskih izvještaja BOSS-Bosanske stranke-Mirnes Ajanović za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih 2020. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, BOSS-Bosanska stranka-Mirnes Ajanović se finansirala iz sljedećih izvora:

| R/B | Izvori finansiranja | Iznos (KM) | Struktura (%) |
|-----------|--|-------------------|---------------|
| 1. | Članarina | 0,00 | 0,00 |
| 2. | Prilozi fizičkih lica (3-a) | 0,00 | 0,00 |
| 3. | Prilozi pravnih lica (3-b) | 0,00 | 0,00 |
| 4. | Prihodi od imovine (3-c) | 0,00 | 0,00 |
| 5. | Prihodi od dobiti preduzeća u vlasništvu političke stranke (3-d) | 0,00 | 0,00 |
| 6. | Prihodi od poklona (3-e) | 0,00 | 0,00 |
| 7. | Prihodi iz budžeta (3-f) | 143.307,94 | 100,00 |
| 8. | Prihodi od propagande (3-g) | 0,00 | 0,00 |
| I | Ukupni prihodi (1-8) | 143.307,94 | 100,00 |
| II | Ostali prihodi i drugo | 0,00 | 0,00 |
| | Izvori finansiranja (I+II) | 143.307,94 | 100,00 |

U godišnjem finansijskom izvještaju za 2020. godinu BOSS-Bosanska stranka-Mirnes Ajanović iskazala je rashode u iznosu od 150.301,73 KM.

2. PREDSTAVLJANJE POLITIČKE STRANKE

Naziv političke stranke je BOSS-Bosanska stranka-Mirnes Ajanović. Skraćeni naziv je BOSS.

Politička stranka je registrovana kod Višeg suda u Tuzli, rješenjem broj: R-I-18/94 od 09.05.1994. godine, pod nazivom: Bosanski omladinski savez „BOSS“ Tuzla. Rješenjem Kantonalnog suda u Tuzli od 24.05.2002. godine i rješenjem Općinskog suda u Tuzli, broj: 032-O-Reg-06-000792 od 08.05.2006. godine, upisana je promjena naziva stranke, tako da novi naziv glasi: BOSS-Bosanska stranka-Mirnes Ajanović.

Sjedište političke stranke je u Tuzli, Kojšino 7.

Lice ovlašteno za zastupanje stranke je Mirnes Ajanović, predsjednik.

Lice ovlašteno za podnošenje finansijskih izvještaja za 2020. godinu je Nedžad Zonić.

Prema podacima iz godišnjeg finansijskog izvještaja za 2020. godinu, BOSS-Bosanska stranka-Mirnes Ajanović ima sljedeću organizacionu strukturu:

- Glavni odbor i
- Regionalni odbor u Sarajevu.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj BOSS-Bosanske stranke-Mirnes Ajanović za 2020. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih 2020. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskog izvještaja BOSS-Bosanske stranke-Mirnes Ajanović obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim osvrtom na prihode iz budžeta.

4. PRETHODNE KONTROLE I REVIZIJE

Služba za reviziju je izvršila pregled, kontrolu i reviziju finansijskih izvještaja BOSS-Bosanske stranke-Mirnes Ajanović u periodu od 2004. do 2019. godine, nakon kojih su izdati izvještaji o pregledu i reviziji sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja za 2019. godinu, izdat je Izvještaj o pregledu sa mišljenjem revizora, nalazima i preporukama stranci da finansijska sredstva koristi isključivo za ostvarivanje ciljeva utvrđenih svojim programom i statutom, da poslovne knjige vodi u skladu sa računovodstvenim propisima, odnosno da vodi pravilne evidencije o rashodima, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i da racionalnije troši finansijska sredstva koja obezbjeđuje iz budžeta.

Nerealizovane preporuke:

Na osnovu uočenih nedostataka u godišnjem finansijskom izvještaju za 2020. godinu, utvrđeno je da stranka nije ispoštovala preporuke revizije.

5. NALAZI I PREPORUKE

5.1. NALAZI

a) BOSS-Bosanska stranka-Mirnes Ajanović prekršila je odredbe člana 4. stav (1) Zakona o finansiranju političkih stranaka¹.

BOSS-Bosanska stranka-Mirnes Ajanović je finansijska sredstva u iznosu od 13.093,81 KM utrošila mimo utvrđenog Programa utroška finansijskih sredstava za 2020. godinu, čime je prekršila odredbe člana 4. stav (1) Zakona o finansiranju političkih stranaka.

U godišnjem finansijskom izvještaju za 2020. godinu BOSS-Bosanska stranka-Mirnes Ajanović iskazala je ukupne rashode u iznosu od 150.301,73 KM.

Uvidom u Program utroška sredstava za 2020. godinu, koji je stranka dostavila uz godišnji finansijski izvještaj za 2019. godinu, utvrđeno je da je stranka planirala ukupne rashode u iznosu od 155.800,00 KM i sredstva za nabavku osnovnih sredstava u iznosu od 3.000,00 KM, odnosno ukupno 158.800,00 KM.

¹ U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

Pregledom finansijskog izvještaja i finansijske dokumentacije, utvrđeno je da je politička stranka sredstva utrošila mimo svog programa utroška sredstava za 2020. godinu, kako slijedi:

- u godišnjem finansijskom izvještaju stranka je iskazala troškove zakupnine vozila u iznosu od 60.800,00 KM, što je za 5.800,00 KM više u odnosu na planirana sredstva.

U Programu utroška sredstava za 2020. godinu stranka je troškove zakupa vozila planirala u iznosu od 55.000,00 KM.; i

- stranka je planirane troškove zakupnine poslovnih prostora prekoračila za 374,32 KM, troškove kancelarijskog materijala za 1.197,08 KM, troškove platnog prometa za 161,40 KM, troškove otpisa sitnog inventara za 549,20 KM, troškove ostalog potrošnog materijala za 2.255,98 KM, humanitarne rashode za 1.903,38 KM, dok je troškove održavanja osnovnih sredstava prekoračila za 852,45 KM.

Stranka je u Programu utroška sredstava za 2020. godinu troškove zakupnine poslovnih prostora planirala u iznosu od 3.100,00 KM, dok je iste ostvarila u iznosu od 3.474,32 KM. U programu utroška sredstava troškovi kancelarijskog materijala planirani su u iznosu od 3.000,00 KM, a isti su u godišnjem finansijskom izvještaju iskazani u iznosu od 4.197,08 KM. Troškove platnog prometa stranka je planirala u iznosu od 1.300,00 KM, a iste je ostvarila u iznosu od 1.461,40 KM. Stranka je otpis sitnog inventara planirala u iznosu od 500,00 KM, a u godišnjem finansijskom izvještaju troškove otpisanog inventara je iskazala u iznosu od 949,20 KM. U poslovnim knjigama stranka je evidentirala troškove ostalog potrošnog materijala u iznosu od 3.255,98 KM, dok je ove troškove planirala u iznosu od 1.000,00 KM. Stranka je u godišnjem finansijskom izvještaju iskazala humanitarne rashode u iznosu od 6.903,38 KM, a troškove održavanja osnovnih sredstava u iznosu od 1.852,45 KM. Programom utroška sredstava stranka je humanitarne rashode planirala u iznosu od 5.000,00 KM, dok je troškove održavanja osnovnih sredstava planirala u iznosu od 1.000,00 KM.

Napominjemo da je stranka Centralnoj izbornoj komisiji Bosne i Hercegovine, dana 26.01.2022. godine, dostavila Rebalans utroška sredstava za 2020. godinu. Stranka, međutim, Rebalans utroška sredstava za 2020. godinu nije dostavila Centralnoj izbornoj komisiji Bosne i Hercegovine u 2020. godini, odnosno neposredno nakon njegovog donošenja, te isti nije uzet u razmatranje.

b) BOSS-Bosanska stranka-Mirnes Ajanović prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu pregleda godišnjeg finansijskog izvještaja, utvrđeno je da BOSS-Bosanska stranka-Mirnes Ajanović nije uspostavila pravilne evidencije o svojim rashodima, čime je prekršila računovodstvene propise i odredbe člana 11. stav (1) i člana 12. stav (1) Zakona o finansiranju političkih stranaka. Stranka nije obrasce godišnjeg finansijskog izvještaja za 2020. godinu popunila u skladu sa Pravilnikom o godišnjim finansijskim izvještajima političkih stranaka („Službeni glasnik BiH“ br. 96/13 i 89/16)-u daljem tekstu: Pravilnik, čime je prekršila odredbe člana 12. stav (4) Zakona o finansiranju političkih stranaka.

(1) U obrascu 1-1 (teritorijalna organizacija političke stranke) godišnjeg finansijskog izvještaja stranka je u iskazala dva organizaciona odbora, Glavni odbor i Regionalni odbor u Sarajevu.

Kontrolom izvoda sa transakcijskih računa i uvidom u obrazac 3-f (prihodi iz budžeta) godišnjeg finansijskog izvještaja, utvrđeno je da se stranka, pored sredstava iz budžeta Kantona Sarajevo i Grada Tuzla, finansirala i sredstvima iz budžeta gradova i općina Sarajevo, Živinice, Gračanica, Travnik i Novi Grad Sarajevo. Takođe, utvrđeno je da je stranka u toku 2020. godine koristila prostorije u Gračanici, te da je imala sklopljene ugovore o djelu sa fizičkim licima za obavljanje administrativno-tehničkih poslova i rada na terenu sa članovima stranke u općinama Novi Grad Sarajevo, Centar Sarajevo, Vogošća, Ilijaš i Travnik.

Pored navedenog, utvrđeno je da su u toku predizborne kampanje sljedeći odbori stranke ostvarili troškove kampanje: Gračanica, Živinice, Tuzla, Novo Sarajevo, Novi Grad Sarajevo, Travnik i Regionalni odbor.

Gore navedeno ukazuje da stranka u godišnjem finansijskom izvještaju nije prijavila sve organizacione odbore stranke, čime je prekršila odredbe člana 10. Pravilnika.

- (2) BOSS-Bosanska stranka-Mirnes Ajanović nije u obrascu 3-f (prihodi iz budžeta) godišnjeg finansijskog izvještaja pravilno iskazala podatke o prihodima iz budžeta Grada Tuzla i Kantona Sarajevo, čime je prekršila odredbe člana 19. Pravilnika.

U obrascu 3-f stranka je iskazala prihode iz budžeta Grada Tuzla u iznosu od 42.228,33 KM i prihode iz budžeta Kantona Sarajevo u iznosu od 38.508,84 KM. Kontrolom izvoda sa transakcijskog računa broj: 1321000309650974 kod NLB Banke, utvrđeno je da je stranka ostvarila prihode iz budžeta Grada Tuzla u iznosu od 36.712,11 KM i prihode iz budžeta Kantona Sarajevo u iznosu od 44.025,06 KM

- (3) Stranka nije uspostavila evidencije o rashodima u skladu računovodstvenim propisima i kontnim planom, te je sve troškove iskazala na obrascima 4.1 (režijsko-administrativni i ostali troškovi) i 4.2 (troškovi propagande) Glavnog odbora i Regionalnog odbora, čime je prekršila odredbe člana 7. stav (2), 22. i 23. Pravilnika.

- Stranka je u godišnjem finansijskom izvještaju, u obrascu 4.1. Glavnog odbora iskazala i troškove zakupa poslovnog prostora koji je koristila u Gračanici, te troškove zakupa prostora za postavljanje banera u predizbornoj kampanji.

Naime, stranka je u obrascu 4.1 Glavnog odbora iskazala troškove zakupa poslovnog prostora u ukupnom iznosu od 3.474,32 KM.

Uvidom u ugovore o zakupu, utvrđeno je da su troškovi zakupa poslovnog prostora koji je koristila Centrala stranke u Tuzli iznosili 2.074,32 KM, dok su troškovi zakupa poslovnog prostora koji je stranka koristila u Gračanici iznosili 1.200,00 KM.

Kontrolom prometa izvoda sa transakcijskog računa koji je stranka koristila za izbornu kampanju, utvrđeno je da je stranka fizičkom licu Ivici Marjanoviću platila zakup prostora za postavljanje banera u predizbornoj kampanji u iznosu od 200,00 KM, te je troškove u istom iznosu iskazala kao troškove zakupnine poslovnih prostorija Glavnog odbora stranke.

Stranka je troškove zakupnine za postavljanje banera u predizbornoj kampanji trebala iskazati u obrascu 4.2 godišnjeg finansijskog izvještaja.

- Služba za reviziju je utvrdila da stranka u obrascu 4.2 nije iskazala troškove kampanje za svaki organizacioni dio pojedinačno.

Kontrolom troškova izborne kampanje koji su iskazani u obrascu 4.2 godišnjeg finansijskog izvještaja, utvrđeno je da je stranka sve troškove kampanje iskazala kao troškove Glavnog odbora i Regionalnog odbora.

Uvidom u račune i evidencije iz poslovnih knjiga, utvrđeno je da su odbori stranke Gračanica, Živinice, Tuzla, Novo Sarajevo, Novi Grad Sarajevo, Travnik i Regionalni odbor ostvarili troškove kampanje, te da stranka ima evidencije za svaki organizacioni dio pojedinačno.

Stranka je imala obavezu da troškove izborne kampanje iskaže po organizacionim odborima.

- Stranka je u poslovnim knjigama troškove ugovora o djelu u ukupnom iznosu od 28.052,12 KM iskazala na kontu 401300-*troškovi vođenja administrativno-tehničkih poslova*.

Iako je sklopila ugovore o djelu sa fizičkim licima za obavljanje administrativno-tehničkih poslova i rada na terenu sa članovima stranke opštinskih odbora BOSS Novi grad Sarajevo, Centar Sarajevo, Vogošća i Ilijaš, te odbora u Tuzli i Travniku, stranka je troškove ugovora o djelu evidentirala na analitičkoj kartici konta 401300-*troškovi vođenja administrativno-tehničkih poslova* na nivou političke stranke, te je iste iskazala u obrascima 4.1 Glavnog odbora i Regionalnog odbora u Sarajevu.

Stranka je u poslovnim knjigama troškove ugovora o djelu trebala evidentirati u skladu sa kontnim planom² i uspostaviti evidencije troškova po organizacionim dijelovima stranke.

- (4) U obrascu 5 (obaveze političke stranke) BOSS-Bosanska stranka-Mirnes Ajanović iskazala je ukupne obaveze u iznosu od 1.679,13 KM.

Uvidom u bruto bilans i Završni račun stranke za 2020. godinu, utvrđeno je da su ukupne obaveze stranke na dan 31.12.2020. godine iznosile 3.385,66 KM, od čega: dugoročne obaveze 1.706,53 KM, obaveze prema dobavljačima 1.402,20 KM i obaveze po osnovu poreza i doprinosa 276,93 KM.

S obzirom da stranka u godišnjem finansijskom izvještaju nije iskazala sve obaveze koje je imala na dan 31.12.2020. godine prekršila je odredbe 24. Pravilnika.

c) Bez kvalifikovanja revizijskog mišljenja, skrećemo pažnju na visinu troškova zakupa motornih vozila.

Uvidom u poslovne knjige i dokumentaciju utvrđeno je da je BOSS-Bosanska stranka-Mirnes Ajanović uzela pod zakup putnička motorna vozila, te je po osnovu korištenja vozila evidentirala troškove u ukupnom iznosu od 60.800,00 KM, što čini 43 % od ukupnih rashoda stranke.

1. U obrascu 4.1 godišnjeg finansijskog izvještaja Regionalnog odbora Sarajevo-Goražde iskazani su troškovi zakupnine vozila u ukupnom iznosu od 40.800,00 KM.

-Uvidom u Ugovor o zakupu putničkog motornog vozila utvrđeno je da je stranka iznajmila putničko motorno vozilo od Smajić Rasima na period od 01.01.-31.12.2020, godine, uz mjesečnu zakupninu od 1.700,00 KM, te mu je u 2020. godini isplatila ukupno 20.400,00 KM.

-Stranka je sa Pleho Harisom zaključila Ugovor o zakupu putničkog motornog vozila na period od 01.01.-31.12.2020, godine i uz mjesečnu zakupninu od 1.700,00 KM, te je i ovom fizičkom licu u toku 2020. godine isplatila sredstva u iznosu od 20.400,00 KM.

2. BOSS-Bosanska stranka-Mirnes Ajanović je u obrascu 4.1 Glavnog odbora iskazala troškove zakupnine vozila u ukupnom iznosu od 20.000,00 KM.

-Uvidom u Ugovor o zakupu putničkog motornog vozila koji je stranka zaključila sa Zonić Nedžadom, utvrđeno je da je mjesečna zakupnina vozila iznosila 1.000,00 KM. Stranka je u toku 2020. godine ovom fizičkom licu po osnovu zakupa putničkog motornog vozila isplatila ukupno 12.000,00 KM.

-Stranka je sa Dedić Muamerom zaključila Ugovor o zakupu putničkog motornog vozila na period od dvanaest mjeseci uz mjesečnu zakupninu od 1.000,00 KM, te je ovom fizičkom licu u toku 2020. godine isplatila sredstva u ukupnom iznosu od 8.000,00 KM.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM³ po biraču u svakom izbornom krugu, prema broju birača koje je objavila Centralna izborna komisija BiH.

Prema podacima Centralne izborne komisije BiH, BOSS-Bosanska stranka-Mirnes Ajanović je u svrhu izborne kampanje za Lokalne izbore 2020. godine mogla da potroši sredstva u iznosu od 350.831,85

² Troškovi ugovora o djelu se uobičajeno evidentiraju na kontu 408.

³ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

KM, a u svrhu izborne kampanje za Lokalne izbore u Mostaru 2020. godine mogla je da potroši sredstva u iznosu od 30.259,20 KM.

BOSS-Bosanska stranka-Mirnes Ajanović u godišnjem finansijskom izvještaju za 2020. godinu iskazala je troškove propagande u iznosu od 10.429,56 KM⁴.

5.2. PREPORUKE

Preporučuje se BOSS-Bosanskoj stranci-Mirnes Ajanović da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva koristi isključivo za ostvarivanje ciljeva utvrđenih svojim programom i statutom,*
- *da poslovne knjige vodi u skladu sa računovodstvenim propisima, odnosno da vodi pravilne evidencije o rashodima,*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i*
- *da racionalnije troši finansijska sredstva stranke koja obezbjeđuje iz budžeta.*

KOMENTAR:

U ostavljenom roku, BOSS-Bosanska stranka-Mirnes Ajanović je dostavila odgovor na Preliminarni izvještaj o pregledu godišnjeg finansijskog izvještaja za 2020. godinu. Uz odgovor stranka je dostavila i ispravljeni obrazac 2 godišnjeg finansijskog izvještaja, čime je djelimično otkolonila nedostatke u popunjavanju finansijskog izvještaja.

Stranka se u svom očitovanju osvrnula na nalaz kojim je utvrđen prekršaj člana 4. stav (1) Zakona o finansiranju političkih stranaka i navela iznose planiranih troškova prema Rebalansu utroška sredstava za 2020. godinu. S obzirom da je stranka tek 26.01.2022. godine Centralnoj izbornoj komisiji Bosne i Hercegovine dostavila Rebalans utroška sredstava za 2020. godinu, primjedba stranke nije uvažena.

Pored navedenog, stranka je dostavila i dokumentaciju o tržišnim cijenama najma vozila, što je irelevantno jer se političkoj stranci skreće pažnja na racionalnije trošenje finansijskih sredstava.

Služba za reviziju je uvažila sve argumentovane primjedbe političke stranke, te je u tom dijelu korigovala nalaze revizije.

Šef Odsjeka za revizijske poslove, revizor

Sanja Tošović

Šef Službe za reviziju

Mr.sc. Hasida Gušić

⁴ Troškovi izborne kampanje, koje je stranka iskazala u obrascu 4.2, u iznosu od 10.229,56 KM uvećani su za troškove zakupnine prostora za baner u iznosu od 200,00 KM iskazane u obrascu 4.1 finansijskog izvještaja.